


# Háteigur



16. árgangur 3. tbl.

30. mars 2012

## Páskaleyfi 2. – 9. apríl

<http://hateigsskoli.is>

### Frá skólaljóra

Ágætu lesendur

Páskaleyfið er handan við hornið og hvet ég alla til að nýta það vel til endurnæringar bæði fyrir líkama og anda. Nemendum og foreldrum þeirra sem fermast sendi ég árnaðaróskir. Orðið páska er komið úr hebresku og merkir að „fara framhjá“ eða „ganga yfir“ og samkvæmt söguhefð tengist orðið frásögn gyðinga um brottförina frá Egyptalandi. Páskarnir snúast um upprisu, endurfæðingu sem páskaegginn minna okkur á.

Brátt kemur vorhljóð í náttúruna sem endurfæðist og lifnar við með kvaki lóunnar sem segir okkur að spóinn fari að koma enda er hún búin að kveða burt snjóinn. Lóan segir okkur til syndanna og heimtar að við tökum nú glöð á móti sumrinu sem er skammt undan, að minnsta kosti samkvæmt tímatalinu. Það kemur sólskin í dali og það kemur blómstur í tún. Við eigum að vinna meira segir lóan og það munum við gera því spretturinn sem eftir er fram á sumar er óvenju stuttur og snarpur og ekki verður slegið slöku við frekar en fyrri daginn.

Í lok apríl verða fjörugir þemadagar og þá stefnum við á fjölgreindarleika, nokkuð sem við höfum aldrei áður gert. Fjölgreindarleikar eru skipulagðir eins og stórar hringekjur með stuttum afmörkuðum verkefnum sem reyna á margar greindir. Greindir Gardners eru: Málgreind, rök- og stærðfræðigreind, rýmisgreind, tónlistargreind, líkams- og hreyfigreind, samskiptagreind og sjálfsþekkingargreind. Vonandi tekst okkur að ná til þeirra allra, hafa gaman og þroskast eitthvað. Nemendum verður skipt í hópa þvert á aldur þannig að nemendur á ólíkum aldri kynnist og læri að vinna saman.

Talandi um fjör, gleði og gáska þá finnst mér ég verði að minnast á árshátíð unglingsstígsins sem fór fram á Hilton hótelinu að kvöldi 28. mars. Hátíðin stóð frá kl. 19:00 til 24:00 þegar nemendum var ekið heim að skóla í rútu. Unglingarnir okkar, með stjórn nemendafélagsins og nefndir sínar eins og árshátíðarnefnd í broddi fylkingar, tókst enn einu sinni að standa að glæsilegri hátíð sem var öllum til sóma. Ég er nú kannski vilhallur af því að þetta eru unglingsarnir okkar en þrúðmennskan, framkoman, samheldnin, jákvæðnin, og sönn gleði fyllti salarkynni hótelsins. Ég óska foreldrum til hamingju með einstakan hóp. Það segir sína sögu um unglingsana okkar að Hótel Hilton skuli vilja greiða götu þeirra í annað sinn með

því að leigja þeim glæsilegasta salinn sinn og bjóða flottan kvöldverð á hóflegu verði.

Ég óska öllum gleðilegra páska.

Ásgeir Beinteinsson  
skólaljóri

### Stytttra páskaleyfi en áður

Við viljum vekja sérstaklega athygli á því að kennsla í Háteigsskóla hefst strax eftir páska, þ.e. 10. apríl.

### Hjólreiðar

Ákveðið hefur verið að nemendur frá og með 4. bekk megi koma á hjóli í skólann eftir páska. Þetta er að sjálfsögðu háð leyfi foreldra og veðurfari og ákvörðun tekin í þeirri von að við séum laus við snjó og hálfu. Foreldrar eru beðnir um að sjá til þess að þeir sem koma hjólandi í skólann noti hjálm. Svo er minnt á að hjólreiðar eru ekki leyfðar á skólalóð á skólatíma eða á starfstíma frístundaheimilisins sem lýkur daglega kl. 17:15.

### Stóra upplestrarkeppnin

Lokahátíð Stóru upplestrarkeppninnar var haldin í Ráðhúsi Reykjavíkur miðvikudaginn 28. mars. Fulltrúar okkar í 7. bekk, Halldóra Líney Finnsdóttir og María Ása Auðunsdóttir, stóðu sig sérstaklega vel og óskum við þeim hjartanlega til hamingju með frammistöðuna.

### Hæfileikakeppni

Mánudaginn 27. febrúar kl. 17-19 var hæfileika- og spurningakeppni í 4. bekk. Þessi hugmynd er ein af þeim sem komu í hugmyndakassa krakkanna, en einn bekkjarfulltrúinn óskaði eftir tillögum þeirra í upphafi vetrar. Allir máttu sýna, bæði börn og fullorðnir, ein eða með öðrum. Úr varð að meirihluti nemendanna sýndi eitthvað og sumir oftast en einu sinni. Það var sungið, dansað, töfrabrögð og galdrar, liðleiki, frumsamið lag flutt, skyrát, spilað á hljóðfæri og foreldri og barn sýndu að þau gátu flautað og hummað um leið, svo eitthvað sé nefnt. Allir komu með eitthvað á hlaðborðið. Endað var á spurningarkeppni þar sem 3-4 börn voru saman í liði og svöruðu 12 spurningum. Þau lið unnu sem voru með öll svörin rétt. Þetta var dýrmæt stund, bæði fyrir börnin og foreldrana.

Hrefna Guðmundsdóttir, bekkjarfulltrúi

## Bókaverðlaun barnanna – vertu með

Lesendur á aldrinum 6-12 ára geta valið bestu barnabækur sem komu út árið 2011. Hver lesandi má velja allt að 3 bækur. Úrslitin verða kynnt við hátíðlega athöfn á sunnudaginn 15. maí. Tvær bækur verða verðlaunaðar, önnur frumsamin og hin þýdd. Hægt er að velja bækurnar fram til 20. apríl. Heppnir þátttakendur fá glaðing.

Atkvæðaseðlar eru á bókasafni skólans og einnig á heimasíðu Borgarbókasafnsins:

<http://borgarbokasafn.is/desktopdefault.aspx/tabid-4393/>

## Fjöll

Nemendur 4. bekkjar hafa unnið verkefni um fjöll og gerðu m.a. þessi ljóð ásamt því að semja lög við þau í tónmennt:

### Ljóð um fjall

Lækur rennur niður lyngbrekkuna,  
hrafnninn flýgur yfir klettana og krunkar.

Blómin anga,  
fuglar syngja,  
flugur suða,  
lömbin jarma,  
kriur garga yfir sjónum.

Ég klif syngjandi upp á fjallatindinn. 4. HHP, hópur I

### Fjallaljóð

Grjót og steinar falla niður hlíðina,  
kindahópur á ferð.

Soltinn valur sveimar yfir  
í leit að bráð.

Græðgin skín úr augum hans.

Bráðin nálgast.

Árás.

Kindur liggja eftir í valnum,  
dauðar.

Valurinn flýgur svekktur á braut. 4. HHP, hópur 2

### Eyjafjallajökull

Eyjafjallajökull er eldfjall stórt

Sem byrjaði að gjósa um miðja nótt.

Það komu drunur og mikil læti

Og enginn dansaði af kæti.

Þetta var ekki mjög vinsælt

og hafði áhrif víða um lönd.

Því flugvélar komust hvorki lönd né strönd.

Sumir fóru að gráta og aðrir voru reiðir

á meðan jökullinn út um loftin öskunni dreifir. 4. GBJ

### Fjallið stóra

Fjallið stóra, Esjan grá,  
sólin læðist bakvið.

Hún er frekar létt á tá,  
kindur, fossar og lækir.

En nú er nóttin köld og blá  
og sólin farin að sofa.

Hlustið englar himnum á  
svo enginn fari sér að voða. 4. GBJ

## Önd eða belja?

Einu sinni var önd sem fékk línuskauta í jólagjöf. En hún var eins og belja á svelli. Gylfi Maron Halldórsson, 2. bekk

## Stærðfræðikeppni grunnskólanna

Í stærðfræðikeppni grunnskólanna sem fram fór 13. mars tóku 20 nemendur þátt. Eins og alltaf stóðu nemendur Háteigsskóla sig vel og voru skólanum til sóma.

Verðlaunaafhending fór svo fram sunnudaginn 25. mars við hátíðlega athöfn og kaffisamsæti.

Kári Gunnarsson náði 4. sæti í keppni 10. bekkjar, Haukur Smári Gíslason náði 6. sæti í keppni 10. bekkjar og Emil Fjóluson Thoroddsen úr 6. bekk náði 4. sæti í keppni 8. bekkjar.

Ég óska öllum þátttakendum okkar til hamingju.

Helgi Baldursson

### Ljóð

L jóð.

J ú, það er gaman.

Ó hh, rosa gaman.

Þa Ð er mega gaman.

Magdalena Schram, 5. bekk

### Vinátta

Vinátta vil eiga góða

verulega og sanna

Arka saman ævislóða,

undrafegurð kanna.

Jóna Gréta Hilmarsd., 7. bekk

## Íþróttahátíðir

Nú eru afstaðnar íþróttahátíðir á öllum stigum skólans. Nemendur yngsta stigs leystu margs konar þrautir í íþróttahúsinu, en miðstignemendur tóku þátt í Skólaleikum Vals þar sem þeir voru kosnir besta stuðningsmannaliðið. Unglingastignemendur kepptu innbyrðis í ýmsum greinum og síðan kepptu þeir við kennara í blaki og körfubolta. Unnu kennarar í blakinu en nemendur körfuboltakeppnina.

### Fótbolti

Í fótbolta er gaman,

þá spilum við saman.

Stundum er mikið hark

og ég hef skorað mark.

Róbert Orri Gunnarsson, 5. bekk / Ísabella Anna Húbertsd., 5. bekk

### Snjór

Ég er stór

eins og snjór

þungt er í fæti,

ei eru læti.

## Eitt, allt og ekki neitt

Einn maður vaknaði einn morguninn, einn tannbursti átti heima inni á einu baði og maðurinn stóð upp úr einu rúmi og labbaði fram einn gang og inn á eitt bað og notaði eina tannburstann og svo labbaði hann lengra út eina ganginn og inn í eitt eldhús og þar var eitt kex og ein kókómjólk, maðurinn fékk sér eitt kex og kókómjólk, í húsinu voru einar buxur og einn bolur og maðurinn fór í ein fót og svo gerði maðurinn eitt, allt og ekki neitt.

Haki Darrason Lorenzen, 5. bekk

## Ég kem úr skóla

Ég kem úr skóla

og sé krakka róla

það er snjór

og hann er stór

þegar ég kem heim

sé ég stjörnur úti í geim

því það er dimmt úti

og ekkert er í grúti.

Karen Ósk Arnarsdóttir, 5. bekk



Spakmæli mánaðarins:

Fyrirgefning veitir meiri gleði  
en hefnd.

